

中國方志叢書·華南地方·第二八四號

據

民國·周恭壽修，趙塏纂
民國二十五年刊本

影印

貴州省

續遵義府志

(七)

成文出版社有限公司印行

續遵義府志卷十八

宦績一

功勳

舊志紀宦績開荒闢昧搜羅缺遺頗費苦心今則六十年來事跡未遠宜乎紀錄增多矣然而仕路至末流貪酷者便其侵漁趨承者流為巧滑鑽求循分盡職不為民害之人已難覩矣况功業有所表見而令人津津不去口者可多得哉舊志宦績分為二卷凡著績郡地有可稱述為一卷職司守土責有專轄為一卷今仍依其例以清眉目其道光二十年以前為舊志所搜採未及者則注明補錄其道光二十年以

後至宣統則依時代臚列焉噫文字之關係古人謂為不朽盛事茫茫宇宙已過者散如雲煙惟賴此志乘流傳以實則效後視今猶今視昔凡負未來之責者可不勉歟

張存意 字覺自湖南華容人萬厯壬申進士官山西僉事會播亂廷議推存意監軍身親行陣左臂中流矢五月底定口不言功恩賞亦弗及貴州建忠勲祠祀之

湖南志
補前志

陳績顯 字無績河南孟津人順治初官川南道時版圖初定招來勸墾修城建學除荒糧免水手四十

餘州縣皆勒石志感

續河南志補前志

伊里布 滿洲鑲黃旗人嘉慶六年進士授國子監學正道光十八年任雲貴總督十月四川綦江縣繼賢與貴州仁懷縣武生趙應彩涉訟繼賢買仇殺應彩糾奸民謝法真等乘勢滋搶沿途裹脅屯踞方家溝貴州提督余步雲布政使慶祿貴西道周廷綬先後帶兵會勦十二月伊里布率兵抵方家溝偕四川總兵張作功等合圍蹙之斬偽元帥趙應松進逼賊巢賊由水溝潛遁官兵分頭追捕擒賊目穆繼賢謝法真等戮其巢穴餘匪殄滅

國史傳

張作功 甘肅皋蘭人生有材勇與兄作友入伍同
隸陝甘督標嘉慶初川教匪作亂從征力戰有功累
官重慶鎮總兵道光十八年貴州仁懷縣妖人謝法
真假托降神捏造天書聚眾滋事雲貴總督伊里布
率作功等勦之謝逆恃險負隅其黨穆繼賢袁明倫
等在地道中放鎗砲屢傷官兵作功偕提督余步雲
總兵阿精阿等囊土負柴挾火攻器具四面協攻竭
一晝夜之力殺賊二百餘人焚其巢斃逆黨無數搜
捕殺獲千名首逆謝法真就擒伏誅敘功賞花翎後
五年卒官

甘肅通志

羅繞典

字蘇溪湖南安化人

生而有文在手曰典因以命名少讀書嶽麓書院凡十二年歲再歸省必徒行曰吾借以習勞也其志趣可想道光己丑成進士入翰林致力經世之學成皇帝時湖南騷變上詢軍事繞典進形勢扼要塞之圖曹振庸亦上言曰有用才也旋上書房員缺潘文恭舉繞典與杜受田上復詢王文恪對曰羅繞典良吏材也遂召對垂詢良久諭近臣曰此人精神滿腹可外任出守山西平陽府歷官秦晉楚黔當髮匪之亂守制在家奉命聯團防守力解長沙圍後擢至雲貴總督咸豐四年遵邑

遭楊鳳凰圍城告急繞典奏請率兵親臨覆旨阻止
略謂黔有撫提諸衆臣遵義區區土寇何勞該督遣
行等語不聽帥道員承齡知府佛爾國春知州徐河
清通判韓超參將蔣玉龍何越保等進兵遵義賊營
雷臺山時以鉅砲轟城屢戰不利慮城不保復恐黔
撫上聞日夜憂勞構疾迨川軍克桐梓繞典即於是
時卒於遵義考棚賜諡文僖

遵義縣
冊報

韓超 字南溪直隸昌黎人道光十四年副貢生以
州判揀發貴州歷署三角壘州同獨山州知州清江
通判咸豐元年粵寇煽亂黔省籌邊防黎平知府胡

林翼言之布政使蔣霽遠略云韓超腹有十萬甲兵
胸羅二十一史沉勇慷慨雄心遠略可為名將可為
循吏超由是知名先後隨林翼在下游屢立戰功以
知縣用賞戴花翎咸豐四年桐梓賊楊鳳圍遵義府
城時提督趙萬春等戰失利超馳至冒雨急戰敗賊
於南門關等處立解城圍擢同知直隸州楊鳳敗竄
超進勦迨至石阡府屬萬彭司河擒斬之餘匪悉殄
補石阡知府晉糧儲道胡林翼巡撫湖北疏言超深
明兵畧剛正不撓可為國家兵事得力之員兵部侍
郎王茂蔭亦薦之升按察使田興恕入黔以超先後

戰功入奏十一年賞二品頂戴署貴州巡撫同治元年粵匪由川竄至正安廟堂並桐梓松坎等處超飭總兵吳安康進勦賊目王考為內應招我軍攻入破賊巢擒逆首偽元帥倪老帽斬之出被脅難民二千餘人黃白號匪竄入遵義東南兩鄉超檄知府李德我等敗之三台山奪五里坎諸隘口遵義附近之張王壩後壩等處各賊營一律蕩平同治二年因病開缺回籍光緒四年卒賜卹如例諡靖果准於貴州省城建立專祠

國史傳

王成璐 字廉普湖北江夏人道光癸未進士為銅

仁知府調補貴陽擢雲南鹽法道會貴州賊楊鳳等
作亂陷仁懷桐梓據其城成璐以滇師隨總督羅纘
典至破走之戮其渠魁遂駐遵義留辦軍務擢貴州
布政使卒於黔

湖北志

承齡 伊胡魯氏滿洲鑲黃旗人道光十六年進士
咸豐元年授貴州安順府知府調貴陽府四年補貴
東道十一月會同雲南鹽法道王成璐督兵進攻雷
台山踞匪乘賊不備縱火焚其巢官兵四路兜勦殺
斃無算生擒賊首陳良模等承齡又率同遵義仁懷
兩縣鄉團收復仁懷縣城奏入賞按察使銜後仕至

貴州布政使照軍營積勞身故例議卹承齡學問淵博著有詩詞等集

國史傳

陶履誠

字實卿江蘇人先宰開泰縣被議降級縣

丞楊鳳之亂率兵援導其時賊營未定先襲大營堡議定凌晨各以三百人蒙霧出履誠趨高橋扼賊於右保山渡洗馬灘截賊於左先以火器燒賊營由煤村溝下保山欲乘勝渡河攻雷台紳團力阻不果履誠聞勝渡洗馬灘與賊遇於乾田壩戰不利退至鴨子墳下石雞窩端坐石上死難賜卹如例

遵義縣冊報

保山

博爾濟吉特氏蒙古正白旗人咸豐二年由

佐領揀發貴州以游擊用四年正月補鎮遠鎮標中
營游擊時貴州苗教各匪蠭起所在攻城戕官焚聚
迭至遵義一帶賊勢尤熾其交界之烏江口上達省
城最為扼要之區又與湄潭甯安黔西等處犬牙相
錯賊由桐梓分股竄擾保山隨總兵色克精阿兼程
馳赴烏江口駐守為遵義後路應援復帶兵由湄潭
甯安堵其東路尋以省城戒嚴巡撫蔣蔚遠檄保山
擊勦桐梓等處以分賊勢時桐梓賊首楊鳳糾衆入
城焚燬衙署監獄直犯遵義府九月保山偕縣丞陶
履誠從右均敗之斬首甚衆獲其砲械火藥多件賊

潰走保山乘力追漸入山谷與陶履誠斬騎躡賊後
乘馬當先沿途搜勦山路盤屈忽遇伏賊四起衆寡
不敵與履誠同歿於陣得旨交部議卹並准建立專
祠國史列傳

祥福 直隸通州人道光朝武進士由頭等侍衛授
貴州下江游擊咸豐五年護理遵義協副將時閭閻
常有賊出沒福內得兵心外捍閭閻不避艱險是年
十月會郡守楊書魁仁懷令江炳琳擊破曾么四等
紅巖賊巢六年九月鄒神保等踞綏陽趙三甲亂十
月會江炳琳攻平頂山賊敗走十一月會綏陽軍攻

杉木箐後台賊巢八年二月初二日會江炳琳勦賊
旺草炮斃白小滿初三日趙帽頂等由毛坳渡頭河
小壩橫據上流蟻聚圍攻福奮戰身帶重傷隨被執
賊叱之跪福曰吾膝只能跪天子安能跪反賊罵不
絕口賊怒炙鐵器烙之體無完膚逾時福北面再拜
詈亦甚縛柱上聚薪火焚之而死大吏上聞議卹各
如例准於死事地方建祠今綏人合祀五公祠內有
司春秋致祭同時馬兵周三鳳亦奮不顧身殺賊數
人而死又有庠生祝麟祥見福受賊慘毒亦罵賊死
三鳳遵邑西門人麟祥綏陽人

採訪冊

王國珍 字春波銅仁人同治元年由銅仁協帶兵充沈宏富營務處赴援來遵遂署副將五月帥所部禦賊尚稽場敗其先鋒於冷水坪連踏賊營十餘處逆遁去秋獲盡登民大蘇困二年正月馳援廬江水屯雷水堰報國寺賊禦國珍甚以數萬人包圍之十六日貓山寨失陷勢益蹙手書至郡乞援當事以鄒開貴帥兵往賊探悉假開貴旂幟飄轟數里外若將至焉而陰與國珍所部哨弁吳某約從國珍潰圍赴援軍國珍甫出營見四面皆賊知為所紿拔佩刀手刃三十餘人力竭死焉銅仁原從兵士千餘人悉戰

歿逃者僅十三人而鄉團及難民死者亦衆蓋自國
珍歿賊勢益猖獗遵亂迺戾矣國珍死亂軍中屍
多不可辨識其妾流涕曰脚根及耳後有紅痣者是
也如其言果得之其妻至省控開貴救援不力巡撫
張亮基頗惜國珍才欲置開貴於法以其前有戰功
責令肅清中路自贖乃已蓋貓山寨之陷在十六日
而國珍潰圍死實二十七日開貴距營數十里奉檄
行八日未至鄉人亦短之

向宗漢 字虎臣湖南鳳凰廳人咸豐五年充勇丁
勦賊柳桂七年征江西擢都司移師貴州攻復黎平

古州諸城九年勦思南石阡疏通省道以副將留黔
同治元年署遵義協副將督勦會匪率師攻尚稽場
圍溪水為流彈所中而死年三十五

湖南通志

秦安慶 字梓園浙江紹興庠生精申韓術咸豐七
年就遵義縣江炳琳幕帶勇隨同江炳琳擊賊八年
六月隨攻螺螄石筍等處賊巢及麻王穿窬等洞以
功薦擢訓導九年炳琳陣亡復隨正安州于鍾岳擊
賊有功擢縣丞十年赴援涓潭縣城復檄署縣事涓
潭城垣本土築烟戶亦稀防禦萬難以團練四千營
水涯子賊攻破之乃移駐火樹營旋因蔣玉龍兵潰